

23 MAR 2001

Hamid-Maal Hijrah

PERPADUAN PEMANGKIN PEMBANGUNAN UMMAH TEMA MAAL HIJRAH

KUALA LUMPUR, 23 Mac (Bernama) -- "Perpaduan Pemangkin Pembangunan Ummah" dipilih sebagai tema sambutan Maal Hijrah 1422 peringkat kebangsaan yang akan disambut Isnin ini.

Menteri di Jabatan Perdana Menteri Brig Jen (B) Datuk Abdul Hamid Zainal Abidin berkata Yang di-Pertuan Agong Sultan Salahuddin Abdul Aziz Shah dijadual merasmikan perhimpunan itu di Stadium Putra, Bukit Jalil pada hari berkenaan.

Beliau berkata tema itu dipilih untuk menekankan pentingnya perpaduan dalam negara untuk meneruskan agenda pembangunan dan kesejahteraan hidup dalam masyarakat.

"Perpaduan yang dianggap sebagai kunci kekuatan, kemajuan dan kestabilan hidup perlu diberi perhatian oleh semua pihak," katanya kepada pemberita di Pusat Islam di sini hari ini.

Beliau berkata, sekiranya perpaduan tidak diberi tempat yang sewajarnya pembangunan akan lambat dan susah dicapai walaupun sesuatu bangsa atau negara itu memiliki sumber dan tenaga yang besar untuk membangun.

Abdul Hamid berkata, sambutan tahun ini akan dimulakan dengan forum khas Maal Hijrah dan diikuti dengan bacaan surah Yassin dan tahlil serta doa akhir dan awal tahun pada petang Ahad bersamaan 25 Mac di Masjid Negara yang akan disiarkan secara langsung oleh RTM.

"Umat Islam yang tidak dapat menyertai solat Maghrib dan bacaan doa akhir dan awal tahun di Masjid Negara diharap akan turut sama-sama mengaminkan doa itu yang akan disiarkan menerusi televisyen," katanya.

Beliau berkata Raja Permaisuri Agong Tuanku Siti Aishah, Perdana Menteri Datuk Seri Dr Mahathir Mohamad dan isteri Datin Seri Dr Siti Hasmah Mohamad Ali dijangka mengiringi Yang di-Pertuan Agong pada kedua-dua majlis itu.

Beliau berkata kira-kira 10,000 hingga 13,000 orang, yang terdiri daripada kakitangan agensi kerajaan dan swasta, badan berkanun, pelajar universiti dan orang awam di sekitar Lembah Klang dijangka menyertai perhimpunan itu.

Abdul Hamid berkata, perhimpunan itu juga akan turut menyaksikan penganugerahan Tokoh Maal Hijrah 1422 oleh Yang di-Pertuan Agong.

Katanya, pemberian anugerah itu adalah sebagai penghormatan di atas pengorbanan seseorang tokoh Islam yang terbukti berjasa dalam menyumbangkan khidmatnya kepada perkembangan dan penghayatan Islam di negara ini.

Pemenangnya akan menerima wang tunai RM30,000 daripada Kerajaan Malaysia dan RM20,000 lagi sumbangan Yayasan Ubaidi, selain plak, pingat dan sijil.

-- BERNAMA

NHA ES AKD